

De Kwakel

De Moerebuuk

Jaorgank 43

**Effe gein èrpel, bolle of graan,
want de moeëretiêd kumtjer weer aan!**



Prins Chris I
Prinses Petra



Jeugdprins Mitchell
Jeugdprinses Daphne

**Mèt dees daag lègge wae de bal ane kantj
En gaon wae jumpendj door 't Moeërelandj**

Vastelaovendj 2008

De Kwakel

Proklamatie

Bèste Moeëre, Moeërinne en anger aanwezige,

Ich, prins Chris I, 57^e prins vanne Moerebuuk, gebore en getoge in Èll,

Zoon van Ley Breukers en Annie Hendriks,

In 2002 door ós pap al aangestoke mèt 't prinsevirus,

Bienao officieel samewoeëndj mèt mien vriendin Petra,

Gebore en getoge Plekplaoster oet Baoksum,

Tot noe toe altiêd gewoeëndj ane Hoeëgstraot vlak bie de Fuus

Bezig aan veurluipig mien lèste vastelaovendj as inwoeëner van Èll,

Biegestaon door 3 fantastische adjudante Sjack, Rens en Martijn,

Same mèt heur dames Steffie en Marleen,

In 't dagelijks laeve agrarisch óngernummer in Èll en wiêt dao boete,

Hievueur ouch frequent reizendj tusse Limburg en Slowakije,

Zit oppe 1^e rie bie de bugels van Fanfare Ellona,

...en bèn teves actief as leider van 'Die Ellenthaler Musikanten'

Same mèt F.V. de Brandjblussers good veur 3 wisselbekers op rie inne Èller optocht,


Bèste invaller van RKESV 3 oppe zunijgmörge,

Gaon d'r saoves gaer oet óm de gezelligheid op te zeuke,

Óm lekker te stappe of óm gewueën op zunijgaovendj ein kaertje te lègge.



Prins Chris I



Verklaor bie de gratie vanne Raod van Elf 't volgendje:



- det ich same mèt mien prinses Petra, mien adjudante Sjack, Rens en Martijn en heur dames dit jaor de spraekwoordelijke ker gaon trèkke in 't Moeërelandj
- mèt in ós spoor de hieële Raod van Elf vanne Moerebuuk en ouch de Jeugdprins en Jeugdprinses, same mèt heur fantastische jeugd-raod
- det wae as de plicht ós reuptj, vol goje mood veur uch klaor zólle staon, vanaaf 't prinsebal tot aan 't hieëringhappe op aswoonsdig
- det wae dit gaer wille doen mèt zoeëveul wie meugelijk "live" blaasmuziek óm ós haer, want ene vastelaovendj zónger blaasmuziek, dae is veur mich óndinkbaar!
- det bie mien afwezigheid de anger muzikante ein krepke deper zólle mótte gaon, woeëbie mich de henj toch waal ins zólle gaon jeuke
- det ich verwacht det F.V. de Brandjblussers zich dit jaor veur 't 10e jaor op rie vanne goje kantj lieëtj zeen inne optocht
- det ich hoop det ouch de anger groepe en einzelgängers weer net zoeë creatief zeen as anger jaore
- det ós pap de kómmendje maandj aaf en toe oppe tendjes zal mótte biête as hae d'r allein veur steit wannieër de prinse-plicht mich reuptj
- mer det zal sangedaags waal gecómpenzerdj waere
- det ich pas nao de vastelaovendj Moeërelandj zal gaon verlaote
- en mich den door de prinsewage via 't aod-gemeindjehoës in Hunsel zal laote aafzette ane Gruttostraot in Haler

- det ich mèt dees daag zal regere in de Orde van 't Blaaskapelke

En dit alles ónger mien motto:

Effe gein èrpel, bolle of graan, want de moeëretiêd kumtjer weer aan, alaaf!

Slowakije, Malé Leváre, 5 December '07



Beste Moeëre, Moeërinne,

In Nederlandj is 't pekskesaovendj, en euver get mieër as eine maandj geit 't gebeure..... den waer ich gepresenteerdj as 57^e prins van 't Moeërelandj.

Tiejes dit sjrieve bèn ich mich, wiêt wèg van alle Sinterklaos-dròkdje, al volop aan 't veurbereije op mien kómmendje taak. Proklamasie sjrieve, same mèt mien prinses en adjudante vergadere, mer veural veul lol make. Ouch de

vergaderinge mèt 't prinsecomitè op ein geheim lokatie zeen geweldig.

Dit alles belooftj get veur 't kómmendje vastelaovesseizoen! En ich mó't zègge, ich kiek dao hieël erg nao oet!!

Langzaam mer zeker huër se steeds dèkker in 't dörp stumme opgaon euver "weem dit jaor de noewe prins zal zeen". Ich weit det nateurlijk al, mèr maag nog niks zègge. Det is sjiek! ... mer aaf en toe ouch waal lestig en spannendj.

Hie, 1100 kilomaeter verderop in Slowakije, hoof ich mich dao neet zoeë dròk óm te make. Vastelaovendj? Dao weurtj men hie neet werm of kaod van. Nou, det is bie mich waal anges! Mien vastelaoves-hert begintj mèt de waek sneller te kloppe, want dae 6^e jannewari, dae kumtj steeds korterbie.

Noe det gae dit laestj, is 't al weer ein waek geleje det ich op spectaculaire meneer gelanceerdj bèn as de noewe prins vanne Moerebuuk. De spits is d'r aaf, zoeë-as det zoeë sjoëen hêtj, en ich weit zeker det dae ónvergaetelijk woor. Same mèt mien prinses Petra, ós gevolg en 't jeugdprinsepaar zólle wae

dit jaor veurop gaon inne Èller vastelaovendj. 'T seizoen zal kort mer hevig zeen.

Mer as gae, Moeërebuuk, d'r same mèt ós weer net zoeë tegenaan gaotj as anger jaore, den weit ich zeker det wae kinne blieve zègge:


"Wae vere vastelaovendj!"

Alaaf!

Prins Chris I




advertentie

SLAGERIJ RUUD EN
MARLEEN HEIJKERSVers vleis
Kantj-en-klaor gerechte
Barbeques
En nog veel mieërVrachtwages blinke
weer nao ein
bezeukske
aan;**TANK & TRUCK
CLEANING WEERT**

LAST VANNE VEUT ?


Den snel
nao pedicureHennie
HeijkersHöbtj gae last
van eur spiere
inne bein of nek.
Den is Beekman-Verleg
de juuste plek.**Kinjer.**

Quincy kreeg les op sjoeël euver det de mins vanne ape aafkwome. Ieërst vreugtj hae aan pap: "In weem ziene boëk höbs dich gezaete?" "In dae van oma Mia," zeet Jan. "En oma Mia, bie weem heet die inne boëk gezaete?" "Jeh," zeet Jan "inne boëk van oma Dora van Appeven, van Otterdijk." Quincy kintj oma van Otterdijk neet en kan 't neet mieër volge. Hae vreugtj aan Mariëlle in weem ziene boëk ze heet gezaete. "In dae van oma Toos" Aahhh," zeet Quincy hieël blie "den is 't dudelik det zie inne boëk vanne ape heet gezaete!"

**Badkamersloot.**

Ouch de laeste kieër mét Ell-niño waas 't weer gezellig drök op 't plein. 'T goje waer en 't juuste programma haje weer de nuëdige minse oppe bein gebracht. Hans Crommentuyn, ouch eine groeëte muziekleefhobber, waas 's middes al ein poeës gegange want dao veel van alles te bewónjere.

Tege de aovendj ging d'r efkes heives get aete mèt 't plan óm 's aoves nog efkes trök te gaon mèt Marlies. Marlies móst zich nog gauw get optutte oppe badkamer. Toen ze ein kwarteer later ins eindelijk klaor waas kreeg ze 't badkamersloot mèt gein meugelijkheid mieër ope. Dao móst Hans nateurlik weer aantraeje mèt tang en sjroevedreijer, mer dae kreeg t'r ouch gein beweging in. Oeteindelijk móst die pal in det sloot doorgeslepe waere mèt de sliptol, dao bleef gein anger meugelijkheid euver. Toen de deur einmaal ope waas veel Marlies bie Hans inne erm, oetgepöjt door de angste die ze haaj mótte doorstaon. "Ich bèn toch bliej des se heives bèst gekómme, anges haaj ich dao sjoeën opgeslote gezaete," bekindje Marlies. "Jao," zeet Hans, "en ein gelök det ich nog neet teveul gedronke haaj!" Later op 't plein kreeg Hans te huëre det t'r stóm waas gewaestj óm Marlies zoeë snel te bevrieje oet heur hachelikke situatie, mer det is ein anger verhaol ..

**Gewuën doorslaope.**

De familie Compeer besloot ouch óm ein paar daag vekansie te vere in eige landj. 'T risico op slecht waer is den waal get groeëter mer good, 't spreekwoord zeet: 'dae neet waogtj dae kumtj nörges' (of zoeëget). Dao waerdje örges nao ein camping gereje en de spulle oetgepaktj en

opgezatte. Zoon Rik haaj zien eige tentje gekrege en dao waas t'r nateurlik gruëts op. Vader Erwin móst waal effe helpe mèt opzette en det bleek gein probleem, ouch al heel d'r eine lap stóf euver op 't lèst. "Die is om voor de ingang van de tent te hangen," dacht Erwin, "en dat heeft ie nu niet nodig!". Saoves laat waas ederein oppe tied meug en 't rëngeldje al ein bietje, dus waerdje mer snel de slaopplaatse opgezócht. Óngertósse waerdje ein bietje rëngel get mieër rëngel en de hieële nacht door nog mieër rëngel. Tege de mörge waerdje 't nater en nater inne tent en stóng ze lètterlik in ein laog water. Toen ginge ze toch mer effe bie de tent van Rik kieke en .. det waas óndanks alles lache! Rik dreef inne tent mèt zien lochtbed op 't water en ... hae sleep gewuën door. 'T menke waas ouch nog zeiknaat gewore ómdet de rëngel door 't daak nao binne kost. Jao Erwin .. dao waas dae lap veur!

**Sjoeën leecht.**

Johan Leeters haaj zich inne felle zón op 't voetbalkamp flink verbrandj aan zien oeëre. Hae haaj ein paar roeëj, blinkendje sjieve aan ziene kop. Gemma verteldje sangerdaags det ze Johan snachs good kost zeen mèt de lamp oet want zien oeëre gove leecht!!

**Vals alarm.**

Christianne en Maarten meindje det ze last haje van muus in heur noew hoes. Ze huërdje mer d'n hieële tiëd ein piepgeluid. Later bleek det Christianne de batterieje verkieërdj inne oplajer haaj gedaon en noe wore die gaon smeule en knettere. Maarten hooldje ze droet en toen waas 't geluid vanne moës ouch wëg.



De Kwakel




Drie kieër Rock & Roll.

In Èll kinne wae mer eine echte concertganger en det is Siem. Dao is bienao geine bekindje pop- of muziekgroep oppe wereldj dae d'r neet gezeen heet. En nao veul groepe geit t'r dèkker kieke, 'waat good is blieftj good' is zien motto. Zoeë wore de Rolling Stones weer ins in Nederlandj, in Nijmege, en Siem haaj aafgesproke mèt ziene aoje kameraod (ouch lètterlik)

Lei oet Kelp. Al smiddes spoke ze aaf in ein of anger kroeg in 't centrum van Nijmege want dao móst nateurlik flink biegekaldj waere. Toen ze saoves nao 't Goffertpark ginge veur 't concert waas det de ièerste kieër rock&roll! Ze wore al behuèrlik aangesjote dus dae muziek klónk nog baeter inne oeëre. De Stones deje weer good heur bèst en Siem genoot weer met volle teuge. Toen 't aafgeloupe waas ging Siem nao de stasie want hae woeëj mèt de trein van Nijmege nao Wieërt. Kapotmeug van alles waat t'r belaeftj haaj veel d'r in slaop. Tege de mörge waerdje hae wakker ... inne trein nog steeds! Dae stong stil op ein rangeerterrein in Den Bosch! Mèt nog eine halfzate kop móst Siem hieëlemaol nao de steurhut vanne machinist óm droet te kinne. Hae sjraveldje door ein ruutje nao boete en veel toen ein paar maeter omlieëg. Det waas de twieëdje kieër rock&roll, mer noe al get minder plezierig want hae bloodje van alle kenj .. auwieë! Mer good, Siem leep trök nao de stasie en paktje toen waal de goje trein op heives aan. Einmaal smörge oppe tied toes gekómme waas 't veur de dèrdje kieër rock&roll wie Corine hum zaag. Wie 't dae kieër is aafgeloupe wete wae neet, mer neet zoeë good dinke wae ...

Breuje.

Francien vanne bekker is oppe verjaordaag van Hub vanne Baars. Hub heet ein hökske met kukes en heet toevallig 't breudmesjen aanstaon en dao is ein eike aan 't oetkómme. Dus dao weurdj door de kinjer get op en aafgeloupe nao det hökske. Francien geit ouch mer ins kieke en zuut naeve de breudkast ein eierduëske vanne Spar staon. "Deh," zeet Francien, "kin se det gewuën doon mèt eier vanne Spar?!!!"



Óm gek van te waere.

De leiding van JWE geit eine kieër per jaor oet aete. Dit jaor hóbbe Mart van Stiene en Stefan Bongers 't oetstepke bedachtj. Ze vertrèkke dae aovendj al vreug richting eindbestumming en laote euveral óngerweges aanwiesing achter. De rest vanne leiding kumtj óm 7 oor bie-ein, behalve Sjan van Heykers, die kumtj get later, vief op zeve. Ze vertrèkke en ómdet Sjan neet achterin dörftj mèt kinjersloot, doortj 't nogal veur ze kinne gaon. De ièerste aanwiesing kumtj telefonisch binne en ze gaon nao Baexem nao de Meule.

Dao aangekómme steit dao de plies. Oeps...dinke de meiste, mer al gauw bliektj d'r ein misverstandj. D'r hóbbe 2 aojer minse in Baoksum ein verdachtj persoeën ein verdachtj pakketje inne voelnisbak zeen stoppe. Daoróm hóbbe die de plies gebeldj en die wore binne 20 minute dao. Ze haje de plastic toët mèt dao-op JWE gesjreve en mèt inhoud van ein zekske cup-a-soep mèt ein mes al inne pliesi-bös ligge. De plies mós t'r waal mèt lache ... De JWE-ers ginge wiejer en ze kwome nao get ómweeg in Beesel aan. Dao ginge ze crazy-dinner doon. Det waas lache en nao 't oplosse van cryptische ómsjrievinge kin se dien bestek en aete bie-ein raoje. 'T kwaam dus veur det emes begós mèt 't toetje en emes

anges de soep zaat te aete mèt ein mes. Ouch wore d'r minse die lang hóbbe mótte wachte op heur aete, mer oeteindelik alles tegeliek kreges, mèt mer eine lepel. Al mèt al waas 't erg lache en eine geslaagdje aovendj.

bladzij 4

advertentie

VEUR ALLE VERZEKERINGEN



NAO
LEON KNAPEN

OUCH VEUR
EURE HYPOTHEEK



Sjoeënhedsspecialiste

Jeanne v/d Hagen

As gae d'r nog knapper oet wiltj zeen.



Heur eige bord?

Op Pinkpop ging 't dit jaor mèt de jónges van Èll weer ins mis. Ze haje flink gedronke mèt die daag en geslaope in ein tentje oppe camping. Det waas veul lol hóbbe en neet heives kinne gaon. Rens vanne Kruys en ónger angere Paul van Jan van Thei meine op ein gegaeve moment ein bord van 3 FM mèt heives te kinne numme. Mer de security haaj heur inne gate en deej alsof ze heur gliufdje. Ze lete de jónges flink sleipe mèt det bord, hele heur inne gate en aaf en toe gove ze ein aanwiesing. Die bewakers lepe al kallentj mèt Rens en Paul mèt en oeteindelik lete ze ós jonges 't bord van 3 FM op zien plaats inne daoveur bestumdje container zètte. Jónges bedanktj!!



advertentie



mook

Moteróngerdeile

Veur appele en paere
Gaotj nao Koppen-Moors




vers vanne boum

De Kwakel

En mer zeuke.

Astrid van Hans van Heber ging same mèt de zangtalente van 't jeugdcomité nao Kelpé óm mèt te doon mèt de Döbbelfrisse Boetegewoeëne Boetezitting. Ze haje allemaol flink in 't glaeske gekeke en ginge mèt z'n alle op de fiets heives. Astrid waas heur fietsesleutelke kwiët en nao lang zeuke waerdje beslote det ze mer bie Hans achterop ging, anges doordje 't te lang. De volgendje mörge ginge ze trök óm te zeuke en waat bleek??? De sleutel stook gewuën in 't sloot.



Weurdje van aod prins Paul I.

Al hieël lang woeëj ich ins prins vanne Moerebuuk waere, en sins wae trök in Èll woeëne is det geveul allein mer sterker gewore. Automatisch geis se 't hieële gebeure steeds mieër inne gate haoje en oplètte waat t'r allemaol gebeurtj. Op de ein of anger meneer dink se des se ein good bieëldj höbst van alles, mer as 't den einmaal zoeë wiet is den wèt se neet waat tich euverkumtj. Det is zieër positief bedoeltj!! Alles leep as de gesmeerdje bliksem, hieël efkes waerdje 't spannendj toen mien sjoeënvader in 't zekehoe belandje. Mer al gauw kwaam steeds baeter noets oet Spanje en koste mien prinses Ana en ich mèt veul plezeer ós take oetveure. Dao is gein moment gewaestj det ich dacht "mót ich weer dit of det ...," nae, integedeil, van al die activiteite kreeg se juist energie en woors se neet kapot te kriege. 'T kost gewuën neet kapot en dao zeen wae al die minse die oppe bein wore en al die vriewilligers die hie en dao de ker trèkke óntzettend dankbaar veur. Ich spraek den ouch oet naam van mien adjudante Ron en Geert mèt heur dames Jacqueline en Anny, en ouch 't jeugdprinsepaar Remko en Carolien, die allemaol zoeë heur bèst höbbe gedaon. Wae haje gelök prins en prinses te zeen in ein periode det de vastelaovendj laeftj in Èll. Hopelik höbbe mien opvolgers det gelök ouch, mer dao gaon wae mèt z'n alle veur zörge .. toch?

Wae zeen ós,
Aod prins Paul I en prinses Ana

advertentie

Veur ein plentje veur inne
mooshoof of ein bleumke
oppe tiêd.
Nao Verhaag haer
is neet wiët.



Kinjer

De drie dames Anny, Miny en Toos die eder jaor mèt de optocht mètdoon en get winne, beslote dit jaor heur priezegeldj good te besteje. Ze ginge mèt de bös nao prinsjesdaag (ze móste waal zelf nog get bie lègge). Dick zaat laat oppe middig mèt Keti oppe sjoëët nao 't noets te kieke, want dao kos oma waal ins in bieëldj versjiene ... Beatrix zweijt en staptj mèt Máxima en Alex inne gouwe koets en Keti reuptj: "Opa, die gaon op vekansie mèt de caravan."



Hoera veur de buurman!

Ellien van Beurskes ging mèt 3 menkes nao 't zwumbad veur zwumles. Ze haje nog ein kwarteer veur thoes te kómme, te aete en weer nao 't voetbalveldj te gaon óm te trainen. Geregeld en gedoons, mer effe later heet ze de 3 jónge vast inne gordel mèt ein bruëdje inne handj, klaor veur vertrèk. Ze startj de auto en wiltj wègrieje, mer det geit neet. De auto kumtj neet vanne plaats. Ellien weurdj zenuwechtig en snaptj d'r niks mieër van. Ze staptj oet en kumtj tot de óndèkking det heure linkse veurbandj geatj is. De auto steit op ein blökske! Ellien begintj te belle veur hulp, want die menkes wore óngertösse aan 't baoke, want ze móste nao 't voetbalveldj en det zoj zoeë neet lökke. Erwin Compeer, de heldj van eine buurman, heet heur geredj. De manne wore get te laat, mer nog oppe tiêd veur de wèdstriêd.




Woeë zeen wae?



Thijs en Francien vanne bekker ginge op eine zunig fietse mèt de kinjer. Det mót gezellig zeen, dus det woeëje ze ouch waal ins probere. 'T doel waas Budsjop in Heytse, veur get lekkers te aete. Zoeë gedacht, zoeë gedaon, mer helaas höbbe ze Heytse neet kinne vinje en waas 't neet zoeë gezellig gewore. Ze höbbe oeteindelik get gaete in Grathem of Baexem, det waas bie 't ter perse gaon van deze Kwakel nog neet hieëlemaal dudelik.

advertentie

Elltaria



gewuën de lekkerste friet en snacks
ouch veur compliceëte sjóttels

advertentie



Veur good
tummerwerk meuktj
Koos Winkelmolen
zich sterk

1e priës euver alles (wisselbeker)
en ouch

1e priës wages
mèt 142 puntje.

"Vastelaovendj vere neet te lieëre."
van; De Prutsers



2e priës mèt 135,5 puntje : "Mèt twieë vorste hōbbe wae
de balans gevónje" van ; Buurt Kunnekoel

3e priës mèt 127 puntje : "Mèt vastelaovendj fieëste wae
good" van ; VV De Zijvermōtse



Oetsleeg Vastelaovesoptocht 2007 van CV De Moerebuuk



1e priës klein groepe
mèt 126,5 puntje.

"Wae hōbbe 't veurjaor inne bol"
van; Golden Girls



2e priës mèt 124,5 puntje : "6 platvèsse"
van ; Carla Heijkers

3e priës mèt 121,5 puntje : "Mèt de juuste
balans"
van ; Tjeu Strous



1e priës groeëte groepe
mèt 139 puntje.

" 'T gevolg vanne Prins"
van ; buurt De Pannestert

2e priës mèt 134 puntje : "Mèt dees daag loupe wae veur sjōt"
van ; 7 Groeëte en 1 Piëp

3e priës mèt 129 puntje : "Wae make ós mèt die daag neet drōk"
van ; Claudia Hansen



1e priës alleingangers
mèt 126 puntje

"Ich hōb eine groeëte klapper
gemaaktj"
door Jos Janssen

2e priës mèt 125 puntje : "Ich trèk d'r mich nijs van
aan"

door Hub Willekens

3e priës mèt 119 puntje : "Noew diersorte gezeen"
door Paul Winkelmolen



De Kwakel

advertentie

**Gaotj d'r ins get dèkker op oet
Beveurbieëldj nao
De Bachelorclub
ofwaal
Bie Siem**



Zeuktj gae ein struukske, ein buimke of ein
plentje veur inne hoof of achter de lamelle



Den mótg gae zeker ins bie
Linders aanbelle

Metsele kin se good allein.

Berend en Hanneke woeëje gaer ein euverkapping achter 't hoes óm lekker lang boete te kinne zitte. Hievueur móst ein meurke gemetseldj waere en Berend vroeg versterking van Ron Deckers dae zelf ein graasj gemaaktj haaj. Same kwome ze d'r waal aan oet Ze hooldje gerei, metselcement en anger spul en ginge ane slaag. 'T waas van det spul woeë allein mer water bie hoeftj, mer det haje de hieëre neet gezeen. Ze mingdje zandj, water en ein sjópke van det metselciment en iefrig waardje de moor gezatte. Toen de moor klaor waas bekeke ze tevreje 't resultaat. "Zoeë, det heet good gegange, noe nog druëge!!!" De volgendje mörge bleek det alle stein los op-ein loge. Ze haje toch nog de verkieërdje verhaojinge gebroektj.



Nog twee laoge
en den kinne wae
't weer aafbraeke.

Wisj djer al



- det Erwin Compeer ein manicuur en pedicuur van zien buurvrouwe haaj gekrege?
- det Carola, Sanne en Fleur hum de negel fijn rose gelaktj haje
- det d'r nörge inne buurt remover te kriege waas
- det wasbenzien en terpetien neet holpe
- det hae de daag d'rop ein werkeuverlèk haaj en dao neet mèt gelakdje negel woeëj versjiene
- det buurman Donald Hut 't neet mieër kost aanzeen en nao Wieërt is gereje óm remover te hole
- det Louis van Kessels ziene auto aan Mart van Stiene mètgoof óm te keure en hum de pincode vanne auto goof óm de startóngebraeker oet te sjakele
- det Louis nao 5 minute al beldje óm te zègge det 't de foute pincode waas, hae haaj hum de pincode vanne telefoon gegaewe
- det ze oppe sjoel de Verrekieker aoj telefoonbeuk verzameldj hóbbe
- det dit ein actie waas veur geldj veur extra kinjerbeuk
- det groep 3 gewónne haaj en eine zitzak heet gekrege
- det dit veural aan inkele moders laag
- det euvral in garages opslaag waas
- det ein moder nog meindje te winne door alle beuk te verzamele en ze den in-ins aan ein van heur 4 kinjer mèt te gaeve
- det dit neet heet moge bate, want groep 3 waas neet te verslaan
- det Sjeng vanne Bekker bienao waas gevalle
- det det kwaam ómdet hae meindje det hae nog aoj telefoonbeuk oppe kast haaj ligge
- det Fer oppe daag det sjoenmoder Agnes in Èll op Niesgoet kwaam woeëne de moeërevlag haaj oetgehange
- det daezelfde daag Louis en Lies 50 jaor getrouwdj wore en ederein móst dinke det Agnes det veur heur deej oet belaeftjheid



Sjoen gebaar.



Luuk oet Kelpen en Tom vanne Spar wore op stap gewaestj in Wieërt en haje oppe trökweeg allebei de fiets kapot. Ze zatte de fietse bie de Tos nieër en beldje eine taxi óm zich heives te laote bringe. Daags dao-op ging Toos mèt Tom nao de Tos óm dae fiets trök te hole. Luuk ziene fiets sting d'r ouch nog. Dus Toos en Tom beslote Luuk ziene fiets ouch mèt te numme nao Èll en rieje heives. Thoes aangekómme beltj Tom nao Luuk óm te zègge det ziene fiets in Èll steit, woeë-op Elly zeet "mer dae heet Luuk desmörge al opgehoojdj ...!" Toos en Tom zeen trök gegange óm dae kapotte fiets trök te zètte bie de Tos zoeëdet nemes 't kost zeen!!! Wil se ins 'ne kieër good zeen ...




Te vreug gerope.

Toos van Peet van Gerris en Toos van Thijs deje mèt kiene de bar ómdet Nol en Idy op vekansie wore nao Las Vegas (óm te kiene). Nao de pauze waas 't neet mieër zoeë drök en Toos van Thijs kiendje mèt mer ze haaj de regels van 't kiene nog neet zoeë good door. Wie ze ein paar riekens vol haaj galmdje ze "KIEN !" vanachter de bar. Det de riekens op ein kaart móste staon wist Toos neet en daoróm haaj ze valse kien. Verder haaj ze waal good opgelètj.



De Kwakel



Good bedoeldj.

Half oktөөber zeen ze oppe Koelstraot mèt grave door de waterleiding haer gegange. In verbandj mèt streng eise zoog op einig moment 't water aafgeslote waere zoeëdet ze koste óngerzeuke of 't water nog waal voldeej en of det d'r ein reparatie nuëdig waas. 'T water zoog inkele ore aafgeslote kinne waere. Marleen

Tertoolen, die inmiddels getraindj is in 't ómgaon mèt calamiteite, beldje de familie Willems oppe Koelstraot óm heur te attendere op 't te verwachte óngemaak. Ouch adviseerdje ze de heer des huizes óm water te tappe as reserve zoeëdet ze neet vast kwome te zitte. Frank W., dae neet veur ein gaat te vange is, leet de hieël badkuup volloupe zoeëdet ouch bie ein toiletbezuuk d'r genóg water zoog zeen. Zoeë gezag, zoeë gedaon en niks kos t'r nog mis gaon. Effe later kumtj José thoes en die zuut det 't bad hieëlemaol volsteit mèt kaod water. "Werkelijk, as se alles aan die men móst euverlaote", dacht José nog. De poes haaj ouch al aan 't water gezaete en José bedinktj zich gein moment en dreitj de knóp van 't bad ope. "Wèg mèt det water," mót ze gedacht hóbbe."

Jeh, en welk water hóbbe ze noe gebroektj veur nao de wc te gaon???? Spa blauw dinke wae



Gezichtsbedrog?

Eine kieër p'r maondj gaon ein paar dames oet Èll nao Boshove óm dao de kneepkes vanne vootzoolreflexmassage te lieëre. Asse den zoeë drök mèt ein bezig zeen en oet betrouwbare bron blicktj det d'r net zoeëveul geroddeldtj as gemasseerdj weurdj, den zitj de contactlens waal ins lestig. Det haaj José Willems ouch en ze leet de lens mèt eine henjige tik in ein glaas water valle zoeëdet dees neet zoeëj oetdruëge en ze neet mèt de massageolie aan heur lens hoofdje te zitte. De aovendj kwaam zoeë langzaam aan 't inj en de dames móste oprume. José die intösse heur henj haaj gewasse zat de lens trök in 't oug. Maria Custers vóltj (mèt ein knipoug nao de angere dames) drek det glaas van José mèt water bie en zètj dit trök. Carla Vosse kwaam effe later oet de keuke trök inne massageruumdje en zuut det José heur glaas leegdrinktj. Carla reuptj drek "José dien lens!" en zoeë bezörgdj asse is,

adviseerdje ze José óm drek eine vinger inne kael te staeke óm zoeë de lens oet te brake. José speuldje 't spel mèt en volgdje 't advies op. Mer de lens kwaam neet te veursjen. Carla heet toen José handsjeunkes en ein zeefke gebracht óm as José nao de wc waas gewaestj te kinne zeuke nao de lens. Carla waas zoeë bezörgtj det ze sangerdaags nog veur de schoeëltied Anja Corstjens heet gebeldj óm 't hieële verhaol oet de deuk te doon en hoe erg 't veur José waas want dit móst nateurlik inne Kwakel. Jao Carla, zoeë 'n verhaol mót inne Kwakel!



Det vreug se dich toch aaf!

Op vastelaovesmaondjig waere bie van de Looy de prinsewages verseerdj. De vlegendje sjóttel vanne dames vanne raad kumtj aangereje veur de lèste aafwerking. Astrid Heber kumtj angefietsj en vreugtj: "Waat is det veur ein dink?". Zeet emes: "Det gebroeke de dames vanne raad veur inne optocht, dao gaon ze mèt loupe. "Oh," zeet Astrid verbaastj, "kinne die ouch loupe."



Kinjer

Tijn van Ron en Anita is mèt de póppe aan 't speule. Ze heet mieër póppe en bie naovraag of 't ein jungkse of ein maedje is zeet ze: "Dit is een jongetje." "Hoe weet je dat nou?" is den de vraag. En hieël zeker van heur zaak zeet Tijn "Deze pop heeft lenzen en meisjes dragen geen lenzen!"



advertentie



Hóbtj gae noew sjoon nuëdig, en wètg gae neet woë te hole ?



Den probeertj ins bie De Schoenenhal van familie Coolen

advertentie

Gae wiltj get speciale decoratie, appaart sjilderwerk of waat den ouch? En gae wètg neet woë haer?

Carien Huijskens adviseerdj uch gaer.



PAND 17



advertentie



Hóbtj gae geine taleknóbbel

Custers Taaladviezen heet dae waal

De Kwakel

advertentie



Is t'r get neet in orde met
eur kat of eure hóndj
Snel nao de dierenkliniek
want dao make ze die
weer gezóndj

EINE
KAMPIOEN


De mik, de bruédjes, de vlaai,
alles is dao zoeë lekker

Nateurlik bie Thijs,
ózze werm bekker



Kwiêt of neet?

Jos van Lemme, Mat van Glabbeek en José van
Miet deje in Kelpen mèt ane bóntje aovendj.
Toen ze klaor wore mèt optraeje drónke ze zich
eine goje en op 't inj vanne aovendj haje ze
geine dorst geleje. Aansloetentj ginge ze nog
get aete bie Elly en José. Wie ze mèt de fiets
heives woeëje gaon kos Jos zien fietstesleutelke
nörges mieër vinje. Nao alle tesse waal drie
kieër te hóbbe naogekeke zeet Elly tege hum
"pak dich hie mer eine fiets mèt." Sangerdaags
ging Jos mèt ein groeëte
nieptang trók nao Kelpen óm
ziene fiets te hole. Bie de zaal
aangekómme stóng dao ziene
fiets en jao ...mèt 't sleutelke
d'r nog in!!




Hub van Luute
Tenieëltechniek

ouch al steit met dees daag alles oppe kop
miene service steit altied veurop !!!

Wirj djer al ...

- det Hub vanne Baars veurig jaor mèt 't oetrike vanne kwakel 2 reme óm haaj?
- det 't moeilik te zeen waas ónger det afdaak ..
- det 't moeilik keze waas? Oof haaj d'r de daag teveure inne kroeg gezaete?
- det Carla van Vosse eine spa blauw bestèldje
- det dae ober vroeg "u bedoelt plat water mevrouw?
- det Carla toen zagt "Wiezoeë, ..dootj gae det den op ein sjuttelke?
- det pestoeër mèt de communiemès veur 't inj de kirk oet ging
- det hae in Neeritter nog ein communiemès móst doen
- det ze dit noe numme "veur 't zinge de kirk oet gaon"?
- det Stefan Bongers en Stan nao Wieërt kirmis ginge
- det Stefan bie de grieperkes de hieële tiêd mis greep
- det Stan toen zagt "Pap, det kin se baeter mèt de henj doen."
- det oma Miny zagt: "Ich wil waal 90 jaor waere"
- det opa Dick toen zagt: "ich waal 100 !"
- det Björn van Berend toen zagt: "Det hool se toch noeëts."
- det Jeroen van Frans vanne Bös eine erm in 't gips haaj
- det dit is gebeurdj ómdet hae last haaj van verleze en mèt zien handj tege de deur aan houdje.
- det d'r aan de deur gelökkig niks aan waas
- det ein van die jónges van Anja en John van Corstjens aan Anja vreugtj: "Mam, bès tich noe ein vrouw van middelbare laeftiêd?"
- det wae nog steeds neet wete waat Anja geantjwoordj heet
- det Simone vanne bekker neet bie RKESV wiltj voetballe want ze vindj gael-greun neet sjoëen
- det ze eigelik roeëd-wit hieël sjoëen vindj en nao AJAX wiltj
- det Marleen tege Amber zagt: "Wèt se waat Vera heet? De waterpókke!"
- det Amber toen zagt: "Die hoof se mich neet te koupe, die wil ich neet"
- det Amber ein waek later aan Marleen vreugtj: "Wie zoj 't mèt Vera zeen, heet se d'r nog geine spiët van?"
- det moder van Lemme aaf en toe kort van aom is
- det Coby toen zagt: "Oma waas hieël kortaaf mèt aome"
- det t'r in 't veurjaor hie en dao ein gael graasveldj te zeen is, minse spuite det kepot veurdet ze gaon spaje
- det gae Frank Vogel kintj vraoge wie det kepot spuite mót
- det Li mer bleef volhaoje des se 'famfare' móst sjriëve in plaats van 'fanfare', ouch toen ze heur probeerdje te euvetuge mèt 't wordebook
- det Li noe zelfs zeet det 't in 't wordebook ouch fout gesjreve is



advertentie

SPAR - Leon Derksen

Veur alle
dagelikse
boeëdsjappe



advertentie

Kriegtj gae ónverwachs
bezeuk oet allerlei heuk?

Lemmenhof

kampere en logere,
bringtj oetkómst



advertentie

Ein sjoëen sjilderieke veur
uchzelf of emes anges



Gaotj ins langs bie
Peter Hermans

KUNSTSJILDER

De Kwakel



Woeë gaon die haer?



- A Nörges, die doon mèt ane optocht
- B Nao de kroeg nateurlik
- C Dae wage trök bringe en aafbraeke
- D Wete wae neet, te lang geleje



advertentie

Veur al eur loeënwark,
snel, good en neet deur




Dao höbbe wae Harrie v/d Looy toch veur

Veur vrachtwages die ein noew
gezicht wille höbbe



truck color design

Wiltj gae
noew tegelkes
ane moor? En gae
kintj det zelf neet doon?



Den nao Peter v.d. Eertwegh.

Weurdje van vorst Henri

Leef moeërebuuk en moeërinne, waat ein jaor en waat is t'r veul gebeurtj. Laot ich beginne mèt 't volgendje, as klein menke van ein jaor of zeve ben ich de vastelaovendj serieus gaon mètmake. Same mèt pap en mam, die toen al aktief wore binne de raod. bezogte wae de recepties, prinsebal en diverse bóntje aovendje binnen en boete Ëll.

As menke droumdje ich d'r van óm later as ich groeët waas ouch bie de raod te kinne. Eine roeëje jas aan en ein móts op, det waas 't hieëlemaol. Ich loesterdj goot waat vorst Jan allemaol zeiverdj en waat d'r allemaol gebeurdj. Einmaal jaore later eindelijk bie de raod ging de droum wiejer, ieërst prins waere en den mesjien, as Jan d'r oeëts mèt stopdje, vorst. Det zoof de volgendje stap waere. D'r waerdje door de jaore hear al get aafspraake gemaaktj op viltjes links en rechts, meestal aan 't buffet mèt ein good glaas beer op. "As Jan Custers d'r mèt stoptj, den nums dich det euver," waas 't advies. Mer 't leep anges dit jaor. Door 't plotseling tróktraeje van Vorst Jan waas de functie van vorst in eine kieër hieël kortbie ... waat noe gedaon?

Beste moeërebuuk, ich höb neet lang hove nao te dinke mer dacht noe höb ich de kans en die pak ich met twieë henj aan.

Prinsebal 2007 waas 't zowiët, ich waerdje Vorst vanne Moerebuuk. En weer kwaam eine droum oet. Same met René, veurzitter vanne Raod van 11 en ouch nog reserve-vorst, höb ich ein fantasies jaor gatj. Det kwaam mede door ós prinsepaar prins Paul en prinses Ana, mèt heur adjudant Ron en Geer en dames Jaquerine en Annie. Drie oeëmes en drie tantes moke de prinselikke familie kómplieët. Ós jeugdprinsepaar jeugdprins Remco en jeugdprinses Carolien höbbe zich goot gepresenteert en zeen behuërluk oppe vastelaovendj aaf geknaltj. Zie höbbe ane jeugd laote zeen wie 't móst, petje aaf! Zoeë-as gae mesjien wétj bèn ich op vereinigingsgebied eine man van en veur de jeugd en veurzitter van 't KVV. Ouch mèt de vastelaovendj is jeugd ein belangriek óngerdeil. Ich dörf te zegge, 't belangriekste waat d'r is, want dae de jeugd heet

En det zitj in Ëll waal good. Door de ónzettendje inzet van 't jeugdcomité, woeë ich hieël veul waardering veur höb, bèn ich d'r van euvertuugtj det wae de kómmendje jaore nog aanwas zat höbbe en blieve kweke. Vanaaf dees plaats wins ich de noewe prins alvast veul succes in dit kort, mer heftig seizoen. Mèt zoeëveul minse oppe bein módt det lökke!

As lèste mer zeker neet ónbelangriek, wil ich de raod bedanke veur de steun die ze mich höbbe gegeave in mien ieëste jaor as Vorst. Mer leef minse, as se zónne groep minse achter dich höbs staon kan ich allein mer zegge: bedanktj, det ich dees functie maag doon!

Moerebuuk, eine goje vastelaovendj!
Vorst Henri



Vekansie 'all-in'.

Thea en Fred, Bér en Nel en Jo en Mary mèt de kinjer haje inne herfstvekansie ein reis geboektj nao Turkije in ein plaats woeë ze nog noeëts wore gewaestj (det is logisch want ze moge euveral mer eine kieër kómmen). Nao ein gooj reis waerdje drek begos mèt vekansie vere, 't waas good waer, in 't zwumbad zaat zeiknaat water en dao waerdje oppe tiêd ein drenkske bezörgdj. Thea zaag op ein gegaeve moment



Jo, Fred en Bér naeve-ein op eine stretcher aan 't zwumbad ligge ... kin djer 't uch veurstèlle? ... Vinkeslaag is t'r niks bië! Mer good, de vekansie waas 'all-in' dus drenkskes koste ze tot eine bepaoldje tiêd gewuën nuttige. Zoeë kwome ze eine aovendj ónger ane bar en dao stóng al ein paar

cocktails klaor óm gedronke te waere. De cocktails wore sjoëen opgemaaktj in versjillendje kleure en mèt sjiefkes appelsien. Nel vónj 't associaal óm die zoeëmer te laote staon en waas t'r dus as de kippe bie óm d'r eine te drinke. Ze kloekdj hum in eine kieër nao binne .. doe zoogs de kleure gewuën inein zakke! Toen begos 't barpersoneël te lache en te lache. Waat bleek? Die cocktails die dao stóng wore eigelik gein echte mer veur de show en as veurbieëldj! Nel is t'r verder gelökkig neet zeek van gewaestj mer hilarisch waas 't waal.


advertentie



LAST VANNE VEUT ?

Den snel nao
pedicure Bep
van Oosterhout-Tobben

Is eure
computer
of printer
d'r meug
aan ?



James Brennand kriegtj
det weer ane gang



Wiltj gae d'r ouch
ins op los drumme?
Veur
slaagwerkmuziek
nao

ELCEE - Leon Camp

CV De Moerebuuk Programma Vastelaovendj 2008

Sjriefjt dit mer alvast oppe klender.
Veur wie laat en zoeë mójtj gae 't Kontaktblad, etc. inne gate haoje.
Aaf en toe ins kieke op <http://www.ellonline.nl/moerebuuk/> kan ouch gein kwaod.

Dinsdig	15 jan : Oefene Bóntje Aovendj
Dónderdig	17 jan : Oefene Bóntje Aovendj
Zaoterdig	19 jan : Receptie noewe Prins Moerebuuk
Zunjig	20 jan : Kaartverkoup Bóntje Aovendj
Dinsdig	22 jan : Oefene Bóntje Aovendj
Dónderdig	24 jan : Generale repetitie Bóntje Aovendj
Vriedig	25 jan : 80+ middig Bachelorclub
Vriedig	25 jan : Bóntje Aovendj
Zaoterdig	26 jan : Bóntje Aovendj
Zunjig	27 jan : Vastelaovesmès
Zunjig	27 jan : Seniorenmiddig
Vriedig	1 feb : Sjoelcarnaval
Zaoterdig	2 feb : Optochtnummers aafhole Bachelorclub
Zaoterdig	2 feb : Activiteit carnavalsvereniginge (?)
Zunjig	3 feb : Vastelaovendj zunjig mèt chipsbal en aovendjactiviteit
Maondjig	4 feb : Vastelaovendj maondjig = OPTOCHT en priësotreiking
Dinsdig	5 feb : Vastelaovendj dinsdig = KINJEROPTOCHT en ... sloëte !



Hieële nacht on-line.

Lex van Leon van Toon van Aerendrees liktj in bèd en speeltj nog get mèt ziene mobiel. Hae veltj in slaop en nao get woele belandj hae oppe knupkes vanne telefoon. P'r ongelök dróktj hae 't nummer van thoes in. Leon heet telefoon naeve 't bèd en paktj op. Hae dinktj midde inne nacht det Lex ziene mobiel waal zal zeen kwietgeraaktj en det hae noe weurdjt gepestj mèt belle. Dus hae goeëjt de hoorn trök op 't nachtkestje, mer naeve 't toestel. De hieële nacht hóbbe ze verbinjing gatj en det heel pas tege de mörge op wie 't beltegoed op waas.




Route du Soleil.

Henk B. ging deze zomer nao Zuid-Frankrijk op vekansie. Die route nao 't zuiei is neet goodkoup vanwege de tolheffing. De tolweeg zeen nateurlik good te ónzeile veur emes as Henk dae dageliks vól reistj tösse Remunj- Èll en Èll- Wieërt. Nao drie en ein half tot veer oor te hóbbe ómgereje en eine extra volle tank kwaam de getraindje vekansieganger oppe plaats van bestumming. En vraog mer neet nao 't humeur van ziene medepassagier Volgendje kieër gewuën Route du Soleil dinke wae.



Döbbel pech.

Marleen (óngertösse waal bekintj in dit blaad) haaj Hans veur ziene 50^{ste} verjaordaag ein noew electrische hëggesjieër kado gedaon. De aoj waas kapot gegange ómdet Hans door de kabel gekniptj haaj. Dao weurdj zoeë wie zoeë lang gewachtj oppe groeëte knipbeurt vanne mètershoeëge coniferehëk. Op eine sjoëne zunjig waas 't den zoeëwiet. Marleen zaat vanoet heure tuinstool Hans te commandere wie hae de sjeër móst hantere en tot vervaeles toe attendeerdje ze hum d'r op det hae veurzichtig móst zeen en neet door de kabel móst knippe. Ómdet de conifere erg hoeëg wore besloot Hans 't zekere veur 't ónzekere te numme en de hoeëgste tek mèt de handsjieër te doen. Mer die handsjieër waas al lang neet mieër gebroëktj. Zooj die nog waal sjerp genóg zeen? Hans wreef mèt ziene doem langs de tandj vanne sjeër ... en jaowaal die waas vliemsjerp! Zoeë sjerp det neet good zichtbaar waas of dae doem nog intact waas of neet. Blojend wie ein verke en mèt eine tieëdoek ómme handj waardje nao de ieëste hulp in Wieërt gegange. T'r huëgdje vanne Intratuin waardje nog effe gekeke of 't allemaol waal zoë erg waas en Hans vónj 't neet nuëdig óm hiemèt nao de ieëste hulp in 't zekehoes te gaon, dus ginge ze trök heives. Dao aangekómme waas de halfgeschore hëk ein doorn in 't ouch van Marleen. Ze zooj zelf de klus waal effe doen. Mèt de electrische sjeër stardje Marleen 't werk en nao 't lèste tekske veel ouch de stroom oet? "Ohh .. nae toch neet!" Marleen haaj door de kabel gekniptj!! Noe al mèt al, ein strak gesjore hëg, eine ingepaktje doem mèt verbandjmateriaal oet de buurt en weer ein kado-idee rieker veur Hans ziene 51^{ste} verjaordaag!!



De Kwakel


'T laag t'r neet good biê.

Thei van Camp ging mèt Jeanne en Rick op vekansie nao Frankriêk en Bram bleef thoes. Thei haaj Bram gevraagd om 'ne kieër 't graas te meije en Bram beloofdje dit te doen. Toen ze trökkwome bekeek Thei ziene gazon en dao waas t'r neet blie mèt, euveral hakkele en gate! Hae ging lieëlik tekieër en Rick vluchdje nao ziene opa Tjeu en oma Mien. Rick deej verslaag aan opa en oma en verteldje det pap neet blie waas mèt ziene gazon. Opa Tjeu keek hum verbaastj aan. Hae waas namelijk zelf daegene gewaestj dae 't graas gemeidj haaj en nog waal mèt ziene eige meijer!



Waat noe?

Christianne en Maarten ginge mèt dochterje Britt eine daag nao Valkenburg. Britt woeëj waterfietse, dus det waerdje gedaon. Maarten heet get aafgetraptj in dae fiets en veuldje inins zien autosleutels oet zien tes valle. En die belandje ouch nog in 't depe water! Dao haje ze dus ein vèt probleem en hōbbe ze Piet en Mia kinne belle om de reservesleutels te bringe.



Weurdje vanne redaktie.

Dit jaor mōtte wae helaas beginne mèt te vertèlle det Thea d'r mèt oetgesjètj is. Thea vanaaf dees plaats eine dikke merci veur dien biedrage de aafgeloupe jaore. Diene vervanger zal zeker get in ziene of heure mars mōtte hōbbe. Verder hōbtj gae nateurlik gemerkjt det de Kwakel weer net zoeë dik is as veurig jaor. Laotj uch dus neet ophaoje en verder laeze mer!!

De Kwakel is ein oetgave van 't Kwakelcomité; Jeanny vanne Kaolder, Corry van Pleunis, Hub vanne Baars, Rianne Goldenbeld en Paul van Miet.

Mèt dank aan Theu van Lemme



advertentie

Veur appele en paere
Gaotj nao Moors-Franssen



vers vanne boum

Sjoeëheidsspecialiste

Mariet
van Enckevort-Janssen



As gae d'r nog knapper oet wiltj zeen.

LAST VANNE VEUT ?

Den snel nao
pedicure
Toos Mennen



Zeuk de 11 versjille !
(Oplossinge örges anges in deze Kwakel)

De Kwakel

Ellske

Kritisch, sjerp en oplèttend. Det is Ellske. Dees aoj tante duid op heur eige meneer verslaag van waat ze zoeë-al hie inne buurt heet gezeen of gehuërdj.



Èll heet eine dörpsraad.

"Zij Aktief" heet heure naam aafgeloupe jaor ieër aangedaon. Ze hōbbe 't initiatief genome om ein biejeinkomst te organisere om te kieke of de Èller gemeinsjap werm te kriege waas veur 't oprichte van eine dörpsraad. In ieëste instantie dreigdje 't weer op niks oet te dreije. Mer oeteindelik steldje ein aantal minse zich bereid om drie kieër te vergadere en daomèt tot ein plan te kōmme. Oeteindelik is dit gelōkt en waas de oprichting van eine dörpsraad ein feit. Inmiddels is 'r officieel geïnstalleerdj ónger groeëte belangstelling vanne Èller bevolking. Ellske is daoróm ouch van meining det in Èll toch nog eine hechte bandj besteit ónger de minse die d'r woeëne en det dit veur de toekomst nog veul perspektief kan beje. Dus "Zij Aktief" herstikke bedanktj veur eure inzèt.



De moeër van Ellske

Steenenbamp.

Is uch ouch opgevalle det, noe wae weer ein jaor verder zeen, d'r nog steeds gein sjōp inne grōndj is gegange? Allein 't bord ane Hoeëgstraot is get verplaatstj, get verder vanne weeg aaf. Ellske dinktj det det is gedaon om d'r noew borde veur te kinne plaatse (met aangepasde datems). Mer d'r is noe waal ein groeët versjil mèt veurig jaor, wae zeen noe neet mieër gemeindje Hunsel mer valle ónger gemeindje Leudal. Verder is óze bōrgemeister mèt pensjoen en wae hōbbe noe vanoet Èll nemes mieër inne gemeindjeraod zitte. Mer dit beedj waal perspektief want noe gaon d'r zich minse mèt bemeuje die mesjien waal verstandj van zake hōbbe.

Weurdj Èll ein verkesdōrp?

Ellske fietsdje lèst euver de Hunnissestraot en zaag det t'r bie Theo vanne Hennes eine noewe stal oet de grōndj weurdj getrokke. Mer Ellske wètj zich toch ouch nog good te herrinjere det nog neet zoeëlang geleje d'r oppe Hunnissestraot eine nog vrie noewe stal waerdje oetgekochtj door de gemeindje. Det det te make haaj mèt 't oetbreijingsplan Steenenbamp. 'T liektj d'r noe op det de visie vanne ambtenieëre kōmplieët is ómgedreitj. Ieëst móste de verkes oet 't dōrp en noe mótte ze d'r weer in! Of wille dees ambtenieëre persé werk blieve haoje zoeëdet ze straks, as fase 3 ane beurt is, ze weer ein oetkoupprocedure kinne startte. Ouch 'n stōk wiejer oppe Hunnissestraot is de bedoeling det t'r ein verkesflat kumtj mèt dao-in 11.000 verkes. As die den straks om aetestiēd allemaal tegeliek beginne te sjrieëwe kriege wae, boete 't feit van stank en fiēnstoof, ouch nog ins flink geluidseuverlast in Èll. En van dae hōësmuziek is zelfs Siem neet gesjarmeerdj!

Hennep plantage opgeroldj.

Eine tiēd geleje waerdje in Èll ein hennepkwekerie óntdektj en waal in Lemmebos. Dit bracht de geruchtestroum "weem dao waal de eigenieër van kost zeen" flink op gank. Ellske wiltj dao neet op spekelere, want veur Jan is 't risiko veul te groeët en hae heet 't al drōk zat mèt ziene kookstudio. En die van 't kamp zeen 't ouch neet gewaestj want die weite good wieveul werk dit mèt zich mètbringtj. Wellichtj heet ein of angere campinggast de advertentie oppe site "lekker blowen en camperen" get te lètterlik genome. Hae heet gedachtj 'ich lèk mich hie inne bos vlak bie miene caravan eine eigen veurraad aan." Wie det Ellske ein paar daag later zelf ins ging kieke veel heur waal op det t'r op ein wanjelbeweegwiezeringspāōlke eine breef hing met de tekst "Lemmebos hennepvrij a.u.b.". Ouch hievan dinktj Ellske det dae dao neet nieër gehange is door Jan want hae kan waal baeter breve sjrieve.

Ponny geregeldj ane wanjel.

Corry vanne Hoof is al drie kieër smōrges vreug oet bèd gebeldj door de pliesie mèt de vraog of de ponny dae richting autobaan löptj van heur is. 'Nae,' zag Corry den steeds, 'dae is van hienaeve, van Marleen en Harry.' En 't is zelfs al eine



kieër veur gekōmme det de pliesie drek daonao weer bie Corry ane deur stōng om te zēgge det t'r bie Harry neet opegedaon waerdje. 'Jeh,' zag Corry toen, 'den beltj nog mer ins aan want ich weit zeker det ze thoes zeen en ich gaon noe zoeë vreug inne mōrgne neet achter dae ponny aan.' Ellske vreugtj zich den ouch aaf woeëdoor dit zoeë dēk heet

kinne gebeure. En det t'rwiel Harry toch bie dit hieële project van dae gigantisch sjoëne tuin nog waal gooj hulp heet gatj van ein tuinbouwsjoëel. Mer blikbaar kriegtj hae de wei neet good aangemaaktj en Ellske heet toch echt gehuërdj det hae euveral verstandj van heet (zelfs van tennisse en voetballe). Nao de derde kieër de pliesie ane deur te hōbbe gatj waerdje inins draod gespanne (de pliesie zal waal gezagtj hōbbe 'drie kieër is sjeepsrecht'). Mer of dae glate draod dae d'r tege de weipāōl heet getummerdj noe dae ponny tege hēldj om weer ane wanjel te gaon is nog mer zieër de vraog.



De Kwakel



Automatisch sloot.

Marleen (die verder neet mèt achternaam genumdj woeë waere en dacht dit jaor neet inne Kwakel te kómme), woeëntj oppe Hoeëgstraot en riedj in eine blauwe fiat, ging mèt vekansie nao Spanje. Mariëlle van Jan van Beurskens lèdje op 't hoës, mer tössedoor kwaam de moder van Marleen ouch ein paar daag nao Èll òm op te lètte. Marleen heure auto is eine automaat dae thoes oppe oprit steit. De moder van Marleen controleerdje bie



vertrèk oet Èll de deure van 't hoës, alles waas good geslote. Ze veuldje ouch nog effe ane klink vanne FIAT en waat bleek? Dae auto stóng al 2 waeke òn-aafgeslote oppe oprit!!! Marleen waerdje gebeltj in Spanje òm te vraoge woeë de reservesleutels loge òm dae auto te kinne sloete. Mer Marleen wist zeker det ze dae auto haaj geslote!!! Mer jao, 't waas waal dudelik, ze riedtj in eine automaat van Corstjens en die gaon waal ins 'automatisch' ope.



Bieësteverdreet.

Thei van Camp haaj op vekansie inne caravan last van muus. Rick sting klaor mèt de bezem en Thei jaagdje de moës op. De moës rendje langs mer Rick deej niks ...! "Woeërom duisse niks?", "vreugtj Thei verbaastj. "Die moës keek mich zoeë leef aan, die kin ich toch neet kapot houwe," zag Rick toen. Altièd gewete det det de leefste is thoes.



Det is nog 'ns geniete.

Sjan van Heykers en Chistianne van Roy ginge oefene veur 't paoldanse. Ze ginge nao eine broor van Paul van Sjan want dae waas op vekansie en den zoeëj nemes heur zeen asse achteróm aan 't oefene wore. Ze ginge lekker te kieër mèt dae paol, nemes dae 't zaag, dachte ze. Laot de buurman vanne broor van Paul en zien vrouw gewuën thoes zeen en achter 't raam hóbbe genote vanne show.



advertentie

Gaotj d'r ins get dèkker op oet Beveurbieëldj nao De Prairie ofwaal Bie Paul en Marlies



Antjwoorde vanne 11 versjille vanne foto van Stef van Lemme:

1. streep oppe bóks
2. slinger ane moor
3. zole vanne sjoon
4. lètters op 't bord rökkantj van Stef
5. haordracht Stef
6. doem linker handj
7. óngeste rink vanne tón
8. voot statief achter Stef oppe gróndj
9. strikske masker oppe tón
10. bord (Brand) links bove ane moor
11. haordracht van 't masker

Inne kasse van Coolen kin djer kómkómmers hole



Frans is neet moeilik.

De oeëme's en naeve vanne Sjilder ginge ein wiekendje nao de Ardenne. Nao smörgens get gefietstj te hóbbe ginge ze smiddes effe ein terrasje pikke. Paul van Miek vanne Sjilder ging effe bestèlle en aangezeen zien Frans neet mieër van deze tièd is deej d'r 't mèt henj en veut. Nao de ober eindelijk dudelik te hóbbe gemaaktj waat t'r móst hóbbe zeet deze "Alléeh ... dat zijn dan 13 pintjes en 2 cola."

Toch nog ein paar euro gevónje?

Bas Moonen geit mèt op stap nao Wieërt, mer òm half ein snachs vindjer 't genógt. Nog effe ein frietj aete en den mèt de taxi op heives aan. Bas zeet tegen de taxichauffeur det hae € 20 heet en geuftj aan det hae de rest waal zal loupe. De chauffeur striektj euver zien hert en bringtj Bas tot aan de veurdeur in Kelpen. € 20,95 steit oppe teller en Bas betaaldj mèt € 30(!)




De Kwakel

Wisj djer al ...

- ▶ det Petra en Twan verhoestj zeen nao Meyel
- ▶ det ze de verhoesberichte zoeë good ingepaktj haje, det ze ze neet mieër koste vinje
- ▶ det Angelique van Fer de pliesie haaj gebeltj ómdet emes op 't voetbalveldj aan 't rónjdrieje waas mèt de auto
- ▶ det dit Jos van Lemme waas dae 't veldj aan 't sleipe waas
- ▶ det Léon vanne Spar mik ging koupe bie Francien toen hae de winkel aan 't verbouwe waas
- ▶ det Francien toen zagt: "Wil se noe de echte mik aete"
- ▶ det Carien van Huyskes vriedig de 13^e hel móst remme mèt de auto en det t'r toen achterin ein bös beige vèrf ope ging
- ▶ det ze dao achter kwaam wie ze de klep ope maaddje en de vèrf euver zich haer kreeg
- ▶ det t'r verleje jaor mèt 't aete nao de bóntje aovendj emes vreugtj: "Jan (Verstappen), bès tich al klaor mèt aete?"
- ▶ det Jan toen zagt: "Jao, ich bèn vól te meuch veur te aete."
- ▶ det Piet toen zagt: "Det is de ieërste kieër det ich det huër."
- ▶ det Thea's oetspraak euver Fredje is: "Probeer zoeë ein goddelijk lichaam mer ins op gewicht te haoje"
- ▶ det wae heur dao succes bie winse
- ▶ det aan Siem waerdje gevraogtj of hae de priës van ein glaas beer mèt de kirmis al wist
- ▶ det ze zich aafvroge of hae 't dao al mèt Marlies euver gadj haaj
- ▶ det Siem toen zagt det det neet maag want det is kartelvorming!
- ▶ det Tonny van Loes bie de bekker 't koffiesjöppelepelke gesloopj haaj en d'r ein oor euver haaj gedaon veur 't te make
- ▶ det hae daonao hoopdje det Thijs 't weer kapot zoj make
- ▶ det Pallie en José van Beurskes bie de Spar boeëdsjappe aan 't doen wore en ein verjaordaagskaart gekochtj haje
- ▶ det Pallie aan José vreugtj: "Zal ich die kaart inne brevebös doen?"
- ▶ det José det ein good idee vónj
- ▶ det as Pallie trök keumtj inne winkel José vreugtj: "woeë is die kaart?"
- ▶ det Pallie toen zagt: "Jeh.. inne breevebös!"
- ▶ det José toen zagt: "Noe mótte wae weer ein kaart koupe want dao steit gein adres en zitj geine postzegel op"

Aetj gae waal
genógtj jónge?



advertentie

Wiltj gae ein plentje veur inne
Hoof of gewuën goje raod ?



Den gouw nao Stals
oppe Hoeëgstraot.



advertentie

Mèt eine caravan droet;
waer of gein waer?
Den mójtj gae nao
Lantinga haer.



Ouch veur eine camper

VAKLAN

advertentie

Mót eure
auto weer
fit door
alle waer?



Gaotj nao
Garage
Heemels
haer.

Boetelandsj kalle.

Aafgelaope jaor waas (aod jeugdprins) Remko ieverig aan 't helpe met 't jaorliks handjboogtoernooi op 't Bisschopelijk College in Wieërt. Same mèt ziene pap en nog mieër leje vanne handjboog organizere ze det eder jaor. Dao weurdj de ganse daag gesjote door neet allein Hollenjers, mer ouch door Belzje en Duitsers. Tössedoor is t'r ouch aaf en toe pauze. Remko waas op det moment aan 't helpe inne catering, want minse die hóngere en dorst kriege kinne dao vanalles koupe. Op ein gegaeve moment kumtj d'r eine sjötter nao binne en kiekjtj nao de liêst waat se allemaol kinst bestèlle. Nao efkes gekeke te hóbbe zeet hae in 't Duits: "Suppe bitte." Remko bedinktj zich gein moment en rentj regelrecht nao de keulkast. "Nein, nein," zeet dae duitser, "Suppe !!" "Jao, jao," zeet Remko en paktj gauw ein fleske beer oet de keuling. "Nein, tomatensuppe," zagt dae mins, en mèt ein gezicht zoeë roeëd wie ein tomaat goof Remko hum ein lekker teske tomatensoep.

Vanne redaktie: Jeh Remko, mèt gaon in 't vastelaovesgeweldj, det kin se as de bèsste. Noe nog 't versjil lieëre tösse ('t Duitse) 'Suppe' en (ós dialekt) 'zoepe' ... mer doe hóbste de tiënd!



Neet tege ver lees kinne.

De aod prinse ginge boregolve in Haler en ze kwome d'r achter det Ton van Gerris neet tege zien ver lees kan. 'T waas zelfs zoeë erg det t'r zien vrouw Maria, die in ein anger groep zaat, mèt eine bal haost euverhaop houdje. En ze dinke noe ouch te wete woeërom hae in zien graasj ein twieëdje keuke geplaatst heet.

Hae hoeftj noe allein vanne carport ein kamer te make en den kinne ze appaart gaon woeëne!



Ane kantj want
ich houw hel.

De Kwakel

"Haastige spoed ..."

Anita van Ron van Deckers ging net veur det ze op vekansie ginge boeëdsjappe doon bie de Spar. Ze kocht ein doeës vol lekkers veur mèt te numme. Anita haaj baby Mies vast in ein handj en de doeës mèt boeëdsjappe in die anger. Óm alles inne auto te kinne laje zat ze de boeëdsjappe achter de auto nieër en zörgdje d'rveur det Mies good inne gordel zaat. "Nog effe nao Wieërt óm de rest vanne boeëdsjappe te hole," zoeë waas ze zich aan 't jage. Later kwaam ze d'r achter det ze de boeëdsjappe vanne Spar vergaete waas inne auto te zette. Dus snel weer nao de Spar, "dao zal waal emes die doeës mèt boeëdsjappe hóbbe aafgegaeve", dacht ze. Mer helaas, ze heet emes anges blie gemaaktj mèt al det lekkers, want de doeës waas verdwene.



Det is nog jaomer.

Yvette van Geert haaj zich via internet ein paar sjoëen laarze besteldj. Ze haaj gelök, 't wore de lèste. Yvette waas t'r hieël blie mèt, allein wore ze ein klein bietje te ing. Ze deej get nate deuk inne laarze, want det



haaj ze oeëts gehuërdj, en zat ze eine daag inne graasj. De volgendje daag wore de laarze wèg. Bie naovraag heet de pap van Yvette de laarze ane kirk inne container gedaon en dae waas net leeg gemaaktj.




Lekkere bótterham.

Martijn van Breukers móst nao heur bedriëf in 't boetelandj en móst daoróm vreug wèg mèt de vrachtwage. Vader Har adviseerdje hum óm oppe tiëd nao béd te gaon .. "Ich smeer dich waal de bótterhamme," zag t'r nog. De volgendje daag kreeg Martijn al gauw hóngér óngerweeg en paktje zich ónger 't rieje eine bótterham oet 't trummelke. Drek wietet hae d'n ieëste kieër inne bótterham beet haaj d'r ein breekke inne móndj ... Waat is det noe? Haaj pap ziene bótterham mèt papeer belagdj? Waas dit ein grap? Toen lagt hae det papeerke naeve zich nieër en dao sting op .. "smakelijk eten".



advertentie



Ein plank hie en ein letje dao. Laotj aanein tummere euver aan


Wim Steuten
Tummerwirke



Gein gèldj mieër inne tes mèt dees daag. Loup den mer bie de Rabobank nao binne. Want dao kins se daag en nacht pinne.

'Sjoëen' werk.

Mariette van Sijr heet ein kunststof tieënstökske veur tösse de tieën te doon zoeëdet 't get mèkkelikker kintj loupe. De hóngj vindj de smaak van dèt stökske waal lekker en wie d'r de kans haaj oot t'r 't lekker op. Wie Mariette en Paul de hóngj ginge oetlaote en hae móst poepe keke ze of 't tieënstökske inne poep zaat. En jaowaal, ze zoge d'r get roeëts tösse zitte. Paul móst toen van Mariette det dink droet vesse en zuver make mèt ein papere zakdeukske.



Waat doon dees minse?



- A Die kieke nao de optocht
- B Die wille de winkel bewake
- C Die meine det t'r get te zeen is
- D Die haje zin in kaoj lieje



De Kwakel

Plat sjerm.



Ron van Breeuwer haaj via internet eine groeëte flatscreen televisie gekochtj en dae thoes inne kamer opgehangen. De volgendje aovendj waas Ron hieël effe bie Marlies gewaestj en daonao ging d'r weer heives. Inne kamer strukeldje hae euver de hóndj, veel op ein teijerke mèet versjèt en dae versjèt vloog pats tege de flatscreen. Ein groeëte ster in det dink! Ron dacht "waat noe?" en bèldje de vólgendje daag de leverancier. "Jae," zeet Ron, "ich zèt det dink aan en 't bieëldj springtj kepot!". "Nou," zeet dae leverancier, "det maag neet, dus steur det dink mer trök." Ron deej det en ein paar daag later haaj d'r de leverancier ane telefoon. "Dao zitj ein ster in," zeet dae leverancier, "det dink is neet kepotgespróng, dao is get tegenaan gekómme. Dus eige sjóldj, dich kriegs geine noewe." "Jeh," zeet Ron, "den goej det dink mer weg." "Nae," zeet dae leverancier toen, "dao höbs dich verwijderingsbiedrage veur betaaldj, dus ich steur hum trök en den kins dich hum zelf wèggoeëje ..."



Ein paar daag later waerdje de flatscreen inne doeës thoesbezörgdj. Ron waas wirke, mer moder waas dao en naam 't pakket in óntvangst. Saoves kwaam Ron thoes, zaag 't pakket en goeëdje de doeës mèet inhoud en al inne hoof.

Ein paar maondj later, Ron haaj óngertösse dein en danger verbouwdj, móst eine houp puin nao de gemeindjeloeëds waere gebracht. Ron zaag die doeës nog inne hoof ligge, óngertösse get naat vanne raengel en vèttig gewore. Hae dacht "die geit noe innegang mèet." Dus die doeës oppe ker gegoeëdj en tösse 't puin gefróty zoeëdet die neet vanne ker zooy valle.

Oppe gemeindjeloeëds vroeg eine iefेरige gemeindjewirker "waat zitj in die doeës?". "Eine kepotte flatscreen," zeet Ron. "Jao mer," zagt dae mins, "dae moog se neet zoeë-mer wèggoeëje. Dich móst det dink oet de doeës hole en in dae container goeëje en die doeës zelf mót weer in eine angere container." Hae wees óngertösse de containers aan.


Dae iefेरige gemeindjewirker begóst zelf al oet te pakke. "Kiek ins aan," zeet t'r tege Ron, "die aafstandjbedening zitj nog hieëlemaol inne verpakking!" Ron keek al ins vreemdj op mer dacht d'r verder neet bie nao. De gemeindjewirker paktje de doeës verder oet. "Mósse kieke, dae flatscreen zitj echt good verpaktj." Noe ging Ron toch mer ins good kieke. "Jao mer," zeet Ron, "zoeë höb ich hum neet ingepaktj...!" Hae det dink verder oetpakke, keek ins oppe flatscreen, mer kost gein ster mieër vinje. Haaj dae leverancier per óngelök eine noewe opgesteurdj? Dao waerdje ein haspel gehóoldj en det dink aangeslote. Dae televisie wirkdje perfect en haaj niks geleje van maondje lang boete ligge en det gegoeëj oppe ker.

Vanne redaktie: Ein sjoeën verhaol Ron. Noe nog zörge det dae hóndj neet mieër inne weeg geit ligge ... En wae vinje det dae gemeindjewirker ein diner-bón waal verdeentj heet!

Wisj dier al ...



- det Frank van Hoke zien hundje ging oetlaote en verderop mèet Ron ane kal kwaam
- det Judy toen van thoes oet get begost te rope
- det Ron toen get opveel en vroeg aan Frank: "Heet Judy heur haor gevèftj?"
- det Frank toen zagt "Jao, mer d'r ónger blieftj 't blóndj!"
- det Jochem 't waal hieël precies woeëj wete
- det t'r vroeg aan Lies vanne Bekker "tante Lies, waat zeetj gae eigelik van ós opa .. ein nicht?"
- det t'r minse zeen die meine det Jac van Coolen zien lintje trök mót gaeve
- det ze det meine ómdet t'r weer inne gemeindjeraod zitj .. Num se dit noe eine kóm-kómmer of eine kwam-kwammer?
- det Jesper eine kieër heives gebracht waerdje nao 't op stap gaon
- det det die hieël buurt heet gewete
- det José van Vlerke appeltaart getrakteerdj heet bie heur aafsied bie de slechter
- det ze deej asof ze dae zelf haaj gebakke, nao moders recept
- det ze dae neet zelf heet gemaaktj, mer Thijs 't recept heet gegaeve van heur eige moder
- det ze det bie de slechter nateurlik neet wiste



advertentie


HENDRIKX-VAN GEMERT



BESTRAOTINGE

Hóbtj gae kabelwerk ?

van Geleuken is den sterk




STERK IN STAOL

DERCKX STAOLBOUW

De Kwakel

.. waat ein
gesjraavel
óm niks ..



Jao Lisa!
Laot ós mer gaon.
Hae begintj mich
nog mieër te krumpe.

Verwin-arrangement.

Marlies heet Paul veur ziene verjaordaag ein verwin-arrangement in Egmond aan Zee kado gedaon, in ein 4-sterre accomodatie mèt alles d'r op en d'r aan. Ze volgdje ein hieël program, de ièrste stap waas leecht-therapie. Dit beteikendje twieë houtse steulkes naeve ein en versjillendje tl-lampe in versjillendje kleure op heur gerichtj. Roeëd waas veur de derm, gael veur de energie en greun veur de erotiek en libido. Helaas ... de greun lamp waas op det moment kapot, dus ze hóbbe zich aafgevraogtj waat ze dao deje. Nao 't oetspringe vanne lampe ginge ze nao de volgendje stap, de Japanse tunkes. Hie pasdje ze net in, eder in ein eige tunke. Ze hóbbe nao dein en danger zitte kieke in ein gevöldj tunke mèt water en nao alle naakse minse die dao rónjdj lepe. De eine nog mieër hangendj vel den de angere. Nao de zonnebank, óm bie te slaope, en nao ein lekker kaod buffet, woeë Marlies neet op zaat te wachte, zeen ze mer de stad in gegange.

Ein fieëst.



Eder jaor organizere de minse die mètgeholpe hóbbe ane Èller vastelaovendj ein fieëst veur zichzelf. Deze kieër speuldje zich alles aaf inne Bachelorclub en sting in 't teiken van de jaore 70, ofwaal "the seventies". De bedoeling waas det ederein zich verklaedje as eine oet de seventies en det mót toegegaeve det det behuërlík gelóktj waas. De binnekómst waas al appaart. Twieë groeëte Amerikaanse autoos waerdje veur de deur gezatte óm 't volk inne stumming te kriege. Mètgebrachdje teikeninge en zoeë euver de jaore 70 waerdje opgehange óm beoeërdeildj te waere veure eine priës. Toen ederein binne waas waerdje de aovendj geopendj door Frank Stals van 't Fieëst Aovendj Comité. De totale organisatie waas in henj van 't FAC en de jónges van "Veur 10 bónne lol", gae kintj ze waal vanne Bóntje Aovendje. Aangekondigdj waerdje det groeëtvorst Jan en prins Paul I en prinses Ana, inmiddels traditioneel, eder ein vaat gove. Det

waerdje nateurlik gewaardeerdj en toen de adjudante Ron en Geert dao nog ein vaat bie deje kost de aovendj al neet mieër kapot.



"The seventies" wore nateurlik de jaore van opvallendje kleure, discomuziek en spelkes doon. Det waas den ouch de roeëje draod door de hieële aovendj. Weem mèt mocht doon ane spelkes waerdje door loting bepaoldj. Mer spelkes zoeë-as "Ren je rot",

.... en "1 van de 8" waerdje dèk door de toesjouwers nog fanatieker gespeuldj as de kandidate. 'T klapstök kwaam toen de marmotte-race (oet de "Wie-kent-quiz") mèt echte marmotte teveysien kwaam. Zoeëveul publiek wore die bieëstjes neet gewindj want ze móste aaf en toe ane vot vroet geduudj waere. Nao eder spelke vele kandidate aaf en zoeë bleef de winnaar euver. De organisatie gaaf 't op lèst nog get prieze wèg veur de winnaar, 't wirkstökske en sjoeënst verklaedje. Al mèt al kwaam de aovendj snel op zien inj en ederein haaj erg genote. Op nao 't volgendje fieëst ... zeetj gae d'r den ouch bie?




Verstenjig.

Siem en Corine ginge nao de broeloft van Frank Coolen in Helmundj. Hieël verstenjig lete ze zich rieje. Toen ze snachs in Èll trök kwome vónje Siem en nog get angere det ze nog neet genógt haje gatj en zakdje verder door bie Siem inne kroeg. Wie Siem heives ging vónj d'r det t'r nog good kost rieje. Ziene auto stóng bie de kroeg veur de deur dus zoeë gedachtj zoeë gedaon. Mer det rieje lökdje toch neet mieër zoeë good as t'r dacht en hae móst de auto parkeren veurdet t'r thoes waas. Det waas op zich hieël verstenjig mer



De Kwakel



PROKLAMATIE VAN JEUGDPRINS MITCHELL EN JEUGDPRINSES DAPHNE



Ich Prins Mitchell,
zoon van Carin en Fred,
de iëste jaore doorgebrachtj oppe Craenestraot hiej in 't
Moerelandj,
daonao via de sjampionkwekerie oppe Brandvenstraot,
noe oppe Sjuër ane Niesstraot belandj.

Thoës bèn ich de aodste vanne veer,
mèt mien zösterke Nikki en breurkes Dave en Sem
höb ich veul plezeer.
Voetballe is mien löst en mien laeve,
dao kin ich mich hieëlemaol aan gaeve.

Gebore op 16 januari 1996 tösse 't prinsebal en de
borebroeloft van det jaor,
waas ich ein jaor later veur de vastelaovendj hieëlemaol
klaor.
Van ós mam móst ich zelf gaon loupe en det höb ich mer
gauw gedaon,
anges mocht ich mèt vastelaovendj neet mèt op stap
gaon.

De gymlesse op sjoeël vinj ich kei-sjiek,
en 't is hieël dèk ein of anger sport waat ich oppe
televisie kiek.
Of 't noe darte, formule ein of schaatse is,
en geine wèdstriëd van Oranje of Ajax dae ich mis.

Ich Prinses Daphne,
dochter van Hans en Astrid,
zösterke van Sven, woeëndj op 't Èllerveldj,
same mèt ós Dribbel, miene heldj.

Mèt streekdance en volleybal als sport,
kóm ich aan beweging niks te kort.
Mer nao 't speule met miene saxofoon bie de
jeugdfómfaar
bèn ich aan 't inj vanne waek pangaar.

Aaf en toe nao de megadance in Rooy mèt mien
vriendinne,
mer den mósse 't danse waal ein bietje kinne.
Danse op muziek doon ich hieël gaer,
mer den waal binne vanwege 't waer.

Same zitte wae op basissjoeël de Verrekieker in
groep acht,
dao höbbe Marieke en Chris ós de hieële daag in
heur macht.
Nao sjoeël MSN-nen of X-Boxen wae edere daag,
waat van ós pap en mam mer ein eurke maag.

Mèt Ilvy en Lars als adjudant
blijft d'r nemes mieër ane kantj.

En dit alles ónger ós motto:


Mèt dees daag lègge wae de bal ane kantj
En gaon wae jumpendj door 't Moeërelandj

ALAAF!



advertentie

Zitj gae met de henj inne haor ?



Gaotj den nao SCISSORS & CO

advertentie

KEPPER

Clown
Goocheliëer
Artiest
Fratsemaker
En nog völ mieër



advertentie

Veur alles
waat mèt bloomstökskes
te make heet



Don en Ilze vd. Winkel
kinne d'r uch aan helpe



Eine foute houp.



Op kirmisjunig, al snachs laat, besloot ein delegasie naeve (3 stöks van 't ras Breukers vanne Hoeëgstraot) óm toch mer ins heives te gaon. Det ging vrie lang good, totdet ze bij de kirmis aanbelandje. D'r móst nogal dringendj gestoptj waere, want de langste van 't stël haaj namelik ein hieël hoeëgnuëdige boeëdsjap te doon (en neet bij de Spar of de bekker!). Hae gaaf det die anger te kinne op zien eige meneer (.. det höbbe wae mótte censurere). Eine van die anger zagt "Jeh, den duis se det toch gewuën hiej in dit 'aafgezunjerdj heukske'. Dae lange twiefeldje effe mer oeteindelik deej hae wat noe einmaol gebeure mót as de nateur reuptj. En later ginge dus 3 tevreje gezichte, mèt 1 groeëte last minder, verder op heives aan. Wae höbbe ós laote vertèlle det det 'aafgezunjerdj heukske' det waas de boetsbaan. En de exacte locatie? ... D'r midde op!

Vraog ane laezer is noe ... woeë heet hae zien vot mèt aafgevaegdj?





VASTELAÖVENDIJ IN 'T MOEËRELAND

www.moerebuuk.nl



Winnendj leedje Leedjesaovendj 2007-2008




Van: Jeugdcomité
Titel: **Vogelvrie**



REFREIN

Ich bin inne wolke
fladder drie daag in 't rón dj
wie eine echte vogel
maak 't echt hieël bóntj
Krieg vleugels oppe rök
en nemes fluitj mich trök
zitj vastelaovendj inne locht
vleeg ich drie daag oet de bocht
Dees daag den gaon wae los ...
De 7e hemel is den hiej bie ós



1e couplet

Mien vleugels kleure roeëd gael
greun
die slaon ich den oet
Blief neet aan de koeëj
3 daag gaon ich d'roet
Ederein is noe weer d'rbiej
ouch dae vreuge vogel is al hiej



2e couplet

Vogele ane wage
loupe in dae bóntje stoet
ich bin neet te haoje
fladder d'r op oet
saoves bin ich dèk 't lèst
Raar vogels gaon laat nao heur nèst



Refrein

3e couplet

Bin ich inne wolke
det is ein fijn gevoel
die vastelaoves locht
die zitj vol flauwekul
aswoonsdig gauw mien koeëj weer in
ómdet ich oetgevogeldj bin.



Refrein